

## Instrucziun actuela i'l ram «Medias ed informatica»

Cul Plaun d'instrucziun 21 es gnieu introdüt il nouv ram «Medias ed informatica». El dess preparar a las scoulas ed als scolars per la digitalisaziun. Per las scoulas significha il nouv ram üna granda sfida, perche ch'el pretenda ün'infrastructura adatteda e persunas d'instrucziun competentas. La scoula cumünela da Samedan ho suot la guida da miaEngiadina ed insembel cun otras scoulas engiadinaisas sviluppo ün concept regiunel per dominar quistas sfidas. Intaunt es la scoula cumünela da Samedan pronta da spordscher ün'instrucziun actuela dal ram «Medias ed informatica».

Il Plaun d'instrucziun 21 es entro in vigur in Grischun l'an scolastic 2018/19. La scoula cumünela da Samedan, scu tuot las scoulas, s'ho stuvieu preparar pel nouv plaun d'instrucziun. Impustüt ho que gieu nom da rimplazzer l'infrastructura antiqueda tres üna nouva, scha mê pussibel favuraivla.

**«Eau sun inchanteda cha nus pudains fich suvenz lavurer culs computers a scoula. Per nos avegnir es que fich important d'avair bunas cugnuschtschas in informatica.»** scolara 3. s-chelin ot

### Preparer a scolaras e scolars in möd optimel per la vita professionela



Dal 2018 ho miaEngiadina – insembel cun cussagls da scoula, mainascoulas e persunas d'instrucziun – sviluppo ün concept regiunel da medias ed informatica per las scoulas engiadinaisas. Quist concept correspuonda a las pretaisas dal Plaun d'instrucziun 21 e da l'Uffizzi per la scoula populera e'l sport dal Grischun. I'l focus staun böts importants scu:

- Las scolaras ed ils scolars dessan gnir preparos in möd optimel per la digitalisaziun e la vita professionela posteriura.
- Las persunas d'instrucziun as dessan pudair concentrer sün lur lezchas pedagogic-didacticas e gnir dis-chargedas da dovairs in connex cun infrastructura e support.
- Las vschinaunchas as dessan pudair procurer a cundiziuns favuraivlas l'infrastructura bsögnavla.
- Grazcha ad üna plattafuorma da cooperaziun dessan las scoulas engiadinaisas avoir l'ocasiun da baratter experienzas.

Il concept da medias ed informatica (u parts da quel) haun surpiglio püssas scoulas cumünelas: Samedan, Bever, Bregalia, Zernez, Val Müstair, Scuol, Valsot e Samnaun. La scoula cumünela da Samedan ho realiso tuot las parts dal concept da medias ed informatica. Quel consista da la colliaziun culla rait da fibra da vaider, da WLAN in tuot las stanzas da scoula e locals d'administraziun, da licenzas da l'Office 365 per tuot las scolaras, tuot ils scolars, tuot las personas d'instrucziun e tuot ils impiegos administrativs scu eir d'üna plattform da collavuraziun regiunela, a maun da la quela las scoulas e vschinaunchas engiadinaisas paun baratter idejas e materiel. Impü ho la scoula cumünela da Samedan rimplazzo ils apparats vegls tres laptops novs per magistras, magisters e scolar(a)s e tres tablets. Actuelmaing posseda la scoula 140 apparats per var 230 scolar(a)s e 50 scolarin(a)s da scouline.

## Internet svelto ed access a datas no da tuot las varts

«Las experiencias fin uossa cull'infrastructura nouva sun fich bunas. Grazcha a la colliaziun culla fibra da vaider es l'internet gnieu desch voutas pü svelto, che cha's bada fich bain, cur cha püs scolars e püssas personas d'instrucziun teles-chargian u telechargian datas a listess mumaint», disch Andry Niggli, il president da la cumischiun da scoula. «Fich pratic es que eir cha s'ho access a documaints u materiel d'instrucziun taunt davent da chesa scu d'ün oter lö. Tuot las scolaras e tuot ils scolars tegnan la listessa adressa persunela d'e-mail düraunt tuot lur temp da scoula.»



## Trer a nüz auncha meglder las pussibilteds in avegnir

«Tecnicaing funcziuna l'infrastructura nouva fich bain – eir grazcha al sustegn da miaEngiadina ed al support tres la firma Informatica», es il güdicat dad Evaristo Cramer e Schimun Janett, magisters e respunsabels per la IT da la scoula. «La scoula nu profita intaunt però auncha da tuot las pussibilteds cha'ls tools novs spordschan. Ed eir il barat d'idejas e da materiel cullas otras scoulas engiadinaisas via la plattform da collavuraziun vain praticho auncha memma poch. Düraunt il 2020 spordscharo la scoula ulteriuras scolaziuns da perfecziunamaint per las personas d'instrucziun in connex culs tools pratics. Impü cumpraro la scoula laptops e tablets supplementers, per cha l'infrastructura correspuonda dal tuot a las prescripziuns dal Chantun.»

**«Per referats, cumponimaints u oters exercizis druva ins suvenz ils apparats mobils, che ch'euo chat fich bun. Nus imprendains a cugnuscher novs programs u a chatter pü svelto infurmaziuns.»** scolar 3. s-chelin ot

**«Quista spüerta ho aviert novas portas pel svilup da la lavur digitela ill'instrucziun e per la collavuraziun illas scoulas.»** persuna d'instrucziun

**«Il ram Medias ed informatica es fich interessant e cool. Eau m'allegradüna fich, cur cha nus vains Medias ed informatica. Il ram es fich infurmativ ed interessant.»** scolar 5evla primara